

in gleicher weite stehen / nun ist die linnen zwischen A. vnd H. die linnen so ich zu der vergröſſung deß andern Corpus haben muß.

Darnach nim ich diese leng A. vnd H. vnd die leng deß ersten Corpus A. B. vnd stoß sie an einander zu einer geraden linnen / also / das auff jeder seiten ein A. stehet / Nun suche ich das mittel zwischen den zweyen A. auff der linnen / das zeichen ich mit J. setze denn also den Circkel mit dem einen fuß in den puncten J. darnach mit dem andern in den puncten A. reiß also ein halben Circkel herumb / biß auff die zwerglinnen / nun fahre ich mit einer auffrechten linnen auß dem puncten B. da sie oben den Circkel antrifft da mach ich ein K. so ist B. K. die höhe der seiten eine zu dem Corpus das zwey maß helt / wie du es dann in diesem theil siehest auffgerissen. Also kanstu durch diese meinung allezeit dem Corpus nach gröſſer machen / Als wenn du ein Corpus wilst machen das drey maß hielt / so setze nur deß ersten Corpus höhe 3. auff einander an der linnen A. G. vnd ziehe darnach die linnen D. J. in der vndersten ersten höhe deß Corpus in puncten B. hindurch / vnd such denn mit dem Richtscheytlein / wie vorgemelt / an der linnen A. G. den mittel puncten H.

Dem auff ein ander weiß viel vierung oder Corpus zu vergröſſern vnd zu verkleinern / dem thu also: Nim die zwo nechst vorgemachte vierung / die einander gleich sind gemacht / als ein maß gezeichnet mit A. B. C. D. die andere zwo maß gezeichnet mit E. F. G. H. setze sie also hart an einander auff ein zwerglinnen / Nun leg ich das Richtscheyt auff der vierung eck J. B. vnd ziehe also ein linnen hinaus / wo sie denn die zwerglinnen antrifft / da mach ich ein J. vnd oben ein K. den puncten J. hab ich dir der Formen halber nicht können hinaus reißen / doch kanstu die linnen K. J. im druck hinaus ziehen / so findestu den puncten J. wider / nun leg ich das Richtscheyt an dem ein end fornen in winckel J. vnd am andern end auff die zwo vierung hinden an iren ecken A. E. vnd zeuch auch ein linnen hinaus / vñ zeichen sie oben mit einem L. den fahre ich mit der linnen G. E. biß oben an die linnen J. K. da mach ich ein M. zihe also ein gleiche zwerglinnen von dem puncten M. hinder sich an die linnen J. E. da setz ich ein N. dann mach ich ein auffrechte linnen von dem puncten N. die vnden die zwerglinnen vnd oben beyde linnen anrühret /

B ij

wo sie